

**Diana Tkebuchava**

<https://orcid.org/0000-0002-4337-3259>

Academic Research Coordinator,  
BRAMS Institute

## **Examining Paul Krugman’s Columns**

(Abstract)

KEYWORDS: Paul Krugman, Economic Analysis, Critical Thinking,  
Media, Columnist, Nobel Prize Winner

Paul Krugman is a prominent columnist for *The New York Times* and Professor of Economics at the Graduate Center, City University of New York (CUNY); he previously taught at MIT and later at Princeton University. In 2008, he was awarded the Nobel Memorial Prize in Economic Sciences. Paul Krugman is not only an economist whose unconventional ideas helped shape modern macroeconomics but also an engaging columnist and a distinguished figure in contemporary American journalism. His columns capture and sustain readers’ attention through rigorous analysis of facts and events, original interpretation, skillfully crafted leads and conclusions, effectively written endings, and intriguing headlines whose meanings are often revealed later in the text. These qualities consistently produce a strong emotional impact.

Even when readers disagree with his creative judgements or struggle to follow his evaluations, they cannot fail to be impressed by his analytic – indeed, critical – thinking. He highlights

influential points, often generalises from evidence, examines issues from multiple angles, and constructs broad, intelligible pictures of current affairs that resonate with a wide audience. Paul Krugman probes the roots of crises and conflicts, and frequently proposes solutions.

He is never shy about making bold claims that provoke prolonged public controversy; yet in contentious contexts, he navigates carefully, anticipating opposing viewpoints and preparing robust defences. His phrasing reminds me of walking over rope bridges while avoiding the dangers of mental traps he puts himself into: he anticipates opposing arguments and prepares measured, well-reasoned rebuttals, navigating complex issues with intellectual dexterity. As both a renowned public intellectual and a rigorous scholar, Paul Krugman combines a keen intellect with a trenchant style.

As a renowned writer and an extraordinarily intelligent scholar, he has an equally sharp mind and sharp tongue. Whether addressing economics or politics, his pieces characteristically offer thorough cause-and-effect analysis and often approach a scholarly standard. At the same time, his content demonstrates mastery of diction and phrasing: Krugman employs apt analogies, evocative metaphors, subtle irony and rhetorical figures to achieve expressive, persuasive columns. Eventually, readers often adopt his measured concern for the issues Krugman discusses and his professional commitment to seeking solutions to apparently intractable problems.

## პოლ კრუგმანის საავტორო სვეტების ანალიზი

საკვანძო სიტყვები: პოლ კრუგმანი, ეკონომიკური ანალიზი, კრიტიკული აზროვნება, მედია, ქალამნისტი, ნობელის პრემიის ლაურეატი

გაზეთ „ნიუ იორკ ტაიმის“ ქალამნისტი პოლ რობინ კრუგმანი განსაკუთრებულად გამორჩეული ავტორია თანამედროვე ამერიკულ მედიაში. მის პუბლიკაციებს შესაშური ანალიტიკური აზროვნების, ფაქტებისა და მოვლენების, პრობლემათა სიღრმისეული კვლევის ოსტატობის, შეფასება-ინტერპრეტაციათა მყარი არგუმენტირებულობის გარდა, ახასიათებს ჟურნალისტური ხელოვნების ისეთი პარამეტრებიც, როგორცაა: აქტიური დასაწყისის (ლიდის) ეფექტური ვარიანტები, შედეგთა პროგნოზირების, დასკვნებისა და რეკომენდაციების შემოთავაზების მეცნიერული სიზუსტე, ინტერპრეტაციის ხელოვნება, მეტაფორული აზროვნება, ტექსტის ესეიზაციის პროფესიონალიზმი, აზრის მომხიბლავ სიტყვიერ ქსოვილში შეფუთვის, ფორმისა და შინაარსის ურთიერთგანპირობებულობის ჰარმონიულობა.

პოლ კრუგმანი 2008 წლის ნობელის პრემიის ლაურეატია საერთაშორისო ეკონომიკის დარგში, კეინსიანისტი<sup>1</sup> და მისი მიმდევარი მოთხოვნის მართვის ფისკალური პოლიტიკის საკითხებში, რაც აისახა როგორც კრუგმანის სანობელო ნაშრომში, ასევე, ბესტსელერში „კრიზისიდან გამოსავალი არსებობს“.<sup>2</sup> „ყველაზე არაორდინალური ამერიკელი ეკონომისტი“, როგორადაც მას თანამედროვე

ეკონომისტთა და ფინანსისტთა დიდი ნაწილი მიიჩნევს, 2007 წელს აშშ-ში დაწყებულ დიდ რეცესიას, რაც მწვავე კრიზისად მოედო დანარჩენ მსოფლიოსაც, ოპტიმისტური პათოსით დაწერილი ნაშრომით შეეხმიანა. მაშინ, როცა ყველა ქვეყნის წამყვანი ეკონომისტები კრიზისიდან გამოსავალს მხოლოდ „ქამრების შემოჭერასა“ და კრიზისის ბუნებრივ დაცხრობაში ხედავენ, ეფექტური სავაჭრო მიმოქცევის თეორიის ავტორი, ნობელიანტი პოლ კრუგმანი ხმამაღლა აცხადებს, რომ არის კრიზისიდან სხვა გამოსავალი, მთაფარია, მისი განხორციელება გაბედონ მსოფლიო ეკონომისტებმა და პოლიტიკოსებმა.

ვიდრე მსოფლიო ეკონომიკური ელიტა ასეთ არჩევანს გააკეთებდა, წამყვანი ამერიკული გაზეთები პოპულარული ჟურნალისტური ჟანრის (თუ ფორმის – ამაზე ჯერაც ვერ შეთანხმებულან მედიათეორეტიკოსები) – საავტორო სვეტის (Column) შექმნას სთავაზობენ კრუგმანს, რის შემდგომ მისი პოპულარობა არნახულ მასშტაბს აღწევს ახალ – მედიაასპარეზოზეც.

პუბლიკაციაში „ამერიკელი მასწავლებლები სიღარიბის ზღვართან“<sup>3</sup> პოლ კრუგმანი ფაქტის ინტერპრეტაციას ლიდშივე ახდენს: „რამდენიმე დღის წინ კენტუკის გუბერნატორმა, კონსერვატორმა რესპუბლიკელმა მეთ ბევინმა კონტროლი დაკარგა თავის შტატზე“. ასეთი დასაწყისი უკვე გარკვეულ ინტრიგასაც შეიცავს და პრობლემის მასშტაბურობაზეც მიანიშნებს: გუბერნატორმა მართვის სადავეები დაკარგა საკუთარ შტატში, მაშასადამე, აქ რაღაც ძალზე მნიშვნელოვანი ხდება. მკითხველის ყურადღება უკვე დაიძაბა, ინტერესი გაღვივდა: „რა ხდება?“ თავად „მისი უდიდებულესობა“ – ფაქტი კი, რომელიც გუბერნატორის ასეთი ფიასკოს მიზეზი გამხდარა, მხოლოდ ამის შემდეგაა შემოთავაზებული: „ათასობით მასწავლებელი ერთი დღით სამუშაოს ტოვებს, რათა პროტესტი, აღშფოთება გამოხატოს მისი (გუბერნატორის, დ.ტ.) პოზი-

ციის გამო განათლების დაფინანსების შემცირების საკითხთან დაკავშირებით“. შემდგომ ჟურნალისტი ცალსახად კრიტიკულად შეაფასებს და მკვეთრად გამოხატავს გუბერნატორის აბსურდულ „ბრალდებას“ და წერს: „ბევრი სკოლა იძულებული გახდა დაეკტილიყო გაფიცვის განმავლობაში, რის გამოც ბოვინი გამოვიდა უცნაური, მეტიც – ყოველად უაზრო ბრალდებით: „მერწმუნეთ, დღეს, სადღაც კენტუკიში, რომელიღაც ბავშვი სექსუალური ძალადობის მსხვერპლი გახდა იმის გამო, რომ შინ დარჩა და არავინ ჰყავდა, ვინც მასზე იზრუნებდა“. ქალამნისტის მკვეთრი კომენტარის არგუმენტად ჟღერს ფაქტი, რომ: „მოგვიანებით გუბერნატორმა ამის გამო მოიბოდიშა, მაგრამ მის ისტერიულ გამოხდომას ღრმა ფესვები აქვს“. კრუგმანი სწორედ ამ „ფესვების“ კვლევას გვთავაზობს პრობლემის არსის გარკვევის მიზნით. საამისოდ იგი ამ კონკრეტულ ფაქტს განაზოგადებს: „დაფინანსების შემცირების იდეით კონსერვატორულმა შეპყრობილობამ იქამდე მიიყვანა რესპუბლიკელები, რომ სახელმწიფოებრივ და ადგილობრივ დონეებზეც ეს იღებს, ზოგადად, განათლების და, კერძოდ, სკოლის მასწავლებელთა წინააღმდეგობის სახეს“. ნობელიანტი-ქალამნისტი სკრუპულოზურად იკვლევს ამ მოვლენის (პრობლემის) მიზეზ-შედეგობრივ ნიუანსებს და ბოლოს „წრიული კომპოზიციის“<sup>4</sup> ეფექტური ჟურნალისტური ხერხის გამოყენებით გვთავაზობს საგულისხმო არგუმენტირებულ დასკვნებსა და რეკომენდაციებს იმის თაობაზე, რომ: „ჩვეულებრივ, დაფინანსების შემცირებას ყოველთვის ის დაპირება ახლავს, რომ ეს უზრუნველყოფს სახელმწიფოს ეკონომიკურად გაძლიერების კოლოსალურ იმპულსს, მაგრამ ეს დაპირება არასოდეს, არასოდეს სრულდება“. შედეგად: „ვიღებთ ერს, სადაც მასწავლებლები თავს სიდატაკის ზღვარზე გრძობენ და იძულებულნი ხდებიან დამატებითი სამუშაო ეძებონ... ეს კი ის ადამიანები არიან, ვისაც ჩვენი შვილების

მომავალს, მათ აღზრდას ვანდობთ, მათ მომზადებას ცხოვრებისათვის, რაც უკვე მათ ძალებს აღემატება...”

სახელმძოვნილ ქალამნისტს შეიძლება დაეთანხმო ან – არც დაეთანხმო, მაგრამ, გამორიცხულია, არ მოგხიბლოს მისმა ანალიტიკურმა, კრიტიკულმა აზროვნებამ, პუბლიცისტური აქცენტების დასმის ხელოვნებამ, ფაქტის განზოგადების, ლოკალური პრობლემის ყველა დონეზე სიღრმისეული კვლევისა და მასშტაბური განზოგადებებისაკენ მიზანსწრაფვამ, კრიზისის ფესვების ძიების სურვილმა და აზარტმა, რაც, ხშირ შემთხვევაში, პრობლემის მოგვარების, გადაჭრის გზაცაა.

ისიც უნდა ითქვას, რომ ქალამნისტის, როგორც ავტორის, თავისუფლება ფორმისა თუ სტილის ან შინაარსის თვალსაზრისით, არავითარ შემთხვევაში არ გულისხმობს მის უპასუხისმგებლობასა და თავაშვებულობას. ეს, პირველყოფლისა, მაღალ პასუხისმგებლობას, პროფესიონალიზმს, ზნეობისა და ეთიკის ნორმათა უპირობო დაცულობას, ურთიერთობის უხადო კულტურას ნიშნავს, რისი კლასიკური ნიმუშიცაა პოლ კრუგმანის ქალამნისტიკა: რეპორტიინგი + ანალიტიკა + შეფასება-თვალსაზრისი, ესაა საორიენტაციო სქემა, რაც მედიააუდიტორიის აზროვნების გააქტიურებას, დასაფიქრებლად პროვოცირებას, ამბავთხრობის ლაბირინთებში გაყოლიებას<sup>5</sup> ემსახურება პოლ კრუგმანის მედიაშემოქმედებაში. ქალამნისტი – საავტორო სვეტის ავტორი არც დამაინტრიგებელ თვალსაზრისებს ერიდება, რაც, შესაძლოა, ზოგჯერ კამათის, ვნებათაღელვის საფუძველიც გახდეს; ოღონდ აქ მას ბეწვის ხიდზე სიარულის აუცილებელი ოსტატობაც გააჩნია, რომ ჩიხში არ მოექცეს და ზუსტად გათვალოს საგარაუდო ოპოზიციური აზრი, მზად იყოს საპასუხო არგუმენტირებულ თავდაცვისათვის.<sup>6</sup>

ნიმუშად უთუოდ გამოდგება ჟურნალისტიკის გრანდის გამორჩეული პუბლიკაცია „მთელი ევროპული პრო-

ექტი დიდი დარტყმის საფრთხის წინაშე“.<sup>7</sup> როგორც უკვე ავლინებ, საკუთარი მოსახრების (შეფასების, ინტერპრეტაციის) წინა პლანზე წამოწევა, ლიდშივე შემოთავაზება კრუმანის ხელწერა: იგი ჯერ მოვლენის, პრობლემის საკმოდ ემოციურ ინტერპრეტაციას გვთავაზობს, რითაც ერთგვარად, ჩავითრევს აქტიური აზროვნების, განსჯის მუდმივად ჟურნალისტურად ტემპანქარებულ პროცესში და მხოლოდ ამის შემდგომ შეუდგება გამოწვლილვით, მეცნიერული სიზუსტითა და სკრუპულოზურობით ამა თუ იმ, ყოველთვის ძალზე აქტუალური, მწვავე პოლიტიკური თუ ეკონომიკური პრობლემის, ამოცანის გასიგრძეგანებას, ანალიზს, მიზეზშედგობრივ კვლევას; გვთავაზობს მოვლენათა განვითარების სავარაუდო პროგნოზებსაც, რაც განსაკუთრებით ფასეულია მედიაშემოქმედებაში.

ამ შემთხვევაში, როგორც ვხედავთ, ტენდენცია უკვე სათაურშია მინიშნებული, რაც მკითხველის ერთგვარ შემზადებას ემსახურება, მისი განწყობის შექმნას მოვლენის ავტორისეული ხედვის გაზიარებისათვის. ეს დამოკიდებულება კიდევ უფრო ღრმავდება ლიდში: „პირდაპირ უნდა ითქვას: რაც მოხდა, თავზარდამცემი იყო. ამასთან, დიდი დოზით, რის გამოც ბევრ ადამიანს მივიჩნევ ლანძღვის ღირსად – დევიდ კამერონით დაწყებული, რომელმაც, როგორც ჩანს, გადაწყვიტა სწრაფწარმავალი პოლიტიკური წარმატების სახელით ისტორიაში შესვლა, როგორც პიროვნებამ, რომელმაც დაშლის ზღვართან მიიყვანა ევროპაცა და საკუთარი ხალხიც, იმ აუტანელი ბრიტანული გაზეთების რედაქტორების ჩათვლით, ჯიუტად რომ ტენიდნენ პუბლიკას ტყუილებს“. პუბლიცისტი აქ, თითქოს, „წუთშესვენებას“ იღებს და ემოციურ ცეცხლს „პატრუქს“ ოდნავ დაუწევს, ტემპს ანელებს და ამოსუნთქვის საშუალებას უტოვებს, ცოტა არ იყოს, შოკირებულ მკითხველს: „ამ სიტყვების წარმოთქმით ოდნავ გულზე მომეშვა და ახლა ნაკლებ ვღელავ ევროკავშირი-

დან გასვლის (Brexit) გამო, ბრიტანულ რეფერენდუმზე რომ ვფიქრობ“. ამის შემდგომ კრუგმანი აანალიზებს მოსალოდნელ შედეგებს ეკონომიკური, ფინანსური, პოლიტიკური კუთხით და ენდინგში გვთავაზობს კონცეფციას: „კაცმა რომ თქვას, ყველა უბედურება, რისიც მეშინია, მაინც მოხდება, ევროკავშირში დარჩენის მსურველებმა რომც გაიმარჯვონ რეფერენდუმში“. აქ მეცნიერს ისევე პუბლიცისტი უთმობს ასპარეზს და ექსპრესიული მხატვრული საშუალება, შთამბეჭდავი მეტაფორა რელიეფურად გამოკვეთს ჟურნალისტის შეფასებას: „ვამტკიცებ: ევროპის დონეზე რეფერენდუმმა მხოლოდ ყურადღება მიაპყრო ფურუნკულს, რომელიც უმაღლ მაინც გასკდებოდა, ბრიტანული ქმედებებისა თუ უმოქმედობის მიუხედავად; მაგრამ, აი, ვის მიაღვა საგრძნობი დამატებითი ზარალი, ზარალი, რომელიც არ იქნებოდა, კამერონს რომ არ გადაეღვა პოლიტიკურად არასწორი ნაბიჯი – დაზარალებული თავად ბრიტანეთია. ცხადია, არ ვარ ბრიტანულ გარემოებათა დიდი მცოდნე, მაგრამ ძალიან სავარაუდოა, რომ რეფერენდუმი თავდაჯერებულობას შემატებს პოლიტიკური ცხოვრების უარეს ელემენტებს და გაერთიანებულ სამეფოს დაშლით დაემუქრება... პრემიერ-მინისტრი, შესაძლოა, მხოლოდ ინგლისის პრემიერ-მინისტრად დარჩეს და არა – ნაწილებად გადაფანტული დიდი ბრიტანეთისა. აქ წერტილს დავსვამ და – „შემდგომ მხოლოდ დუმილია...“ მაგრამ, ჩანს, ქალამნისტი აქ მაინც ვერ სვამს „საფინანსო წერტილს“<sup>4</sup> და განაგრძობს: „ახლა კი დაცხრით, ნუ გამოიტირებთ მაკროეკონომიკის ასეთ ხანმოკლე ამქვეყნიურ არსებობას. სხვათა შორის, ევროპის გამო გლოვა თქვენ ჩემი დარიგების გარეშეც გმართებთ. ხოლო თუ განგაშის ზარების შემოკვრა გსურთ, ივანგაშეთ ბრიტანეთის გამო...“

ვნებათაღელვა ბრექსიტის ირგვლივ ჯერაც არ დამცხრალა. ძნელი სათქმელია, რას მოუტანს იგი ინ-

გლისსა თუ მთლიანად გაერთიანებულ სამეფოს, ანდა ევროკავშირსა თუ დანარჩენ მსოფლიოს. დისტანციურად, სხვა ქვეყნის მოქალაქის თვალსაწიერიდან (რომელიც თავად აღიარებს, რომ ბრიტანულ გარემოებათა დიდი მცოდნე არაა), ისიც ძნელი სათქმელია, მცდარი იყო თუ არა დევიდ კამერონის თამამი პოლიტიკური ნაბიჯი. არჩევანი ქვეყნის მოსახლეობამ – გაერთიანებული სამეფოს თითოეულმა მოქალაქემ გააკეთა. აქ ზემოთქმულის გამეორება მომიხდება – ჟურნალისტს, შესაძლოა, დაეთანხმო, ან – არა, გაიზიარო მისი პოზიცია ან კიდევ, არც მთლად, მაგრამ, ვფიქრობ, შეუძლებელია არ მოიხიბლო ამერიკული მედიის სითამამით, მიზანსწრაფულობით, გამობატვის თავისუფლებით, სიტყვით დარწმუნების ხელოვნების ოსტატობითა და პროფესიონალიზმით.

სტატიაში „ეს უაზრო სავაჭრო ომი“<sup>8</sup> პოლ კრუგმანმა კრიტიკის ქარცეცხლში გაატარა აშშ-ის მიმდინარე სავაჭრო პოლიტიკა, რომელიც, ხელისუფლების გათვლით, სამუშაო ადგილების შექმნაზეა ორიენტირებული. აქაც, ქალამნისტი უკვე სათაურში და, შემდგომ, პირველსავე სტრიქონში გვთავაზობს პრობლემის შეფასება-ინტერპრეტაციას: „მაშ ასე, სავაჭრო ომი დაიწყო და, რაოდენ უაზროა იგი!“ ასეთი კატეგორიული განცხადების შემდგომ, ავტორი ეკონომიკურ კანონზომიერებათა ლოგიკური ანალიზის, პროფესიონალური მსჯელობის მომარჯვებით იკვლევს მოვლენის არსს, მის სპეციფიკას: „ფოლადსა და ალუმინზე ახალი გადასახადის დაწესების ოფიციალური, იურიდიული საფუძველი ეროვნულ უსაფრთხოებადაა შეფასებული. თუ გავითვალისწინებთ, რომ ძირითადად, უშუალო მსხვერპლნი გახდებიან მოკავშირეები დემოკრატიული ბანაკიდან, ეს „საფუძველი“ აშკარად თაღლითობად აღიქმება“. შემდეგ კრუგმანი თავმდაბლურ პოზიციას იკავებს: „ისე თუ ასე, ეკონომისტი ვარ (შეგახსენებთ, იგი ნობელიანტია საერთაშორისო ეკონომიკაში,

დ.ტ.) და შემძლია ვთქვა: იმის მიუხედავად, რეალურად კარგია თუ ავი არსებული სავაჭრო პოლიტიკა, სამუშაო ადგილების შექმნასთან დაკავშირებით მისგან მიღებული შედეგი ნულის ტოლი იქნება“. ავტორი პროფესიონალურად განიხილავს საამისო ოთხ მიზეზს და დაასკვნის: „ამდენად, ეს უდავოდ უაზრო ომია, რომელშიც სიტუაცია ჩვენი ქვეყნის სასარგებლოდ ვერ განვითარდება...“

ანალოგიურად, კრიტიკული, კატეგორიული, რამდენადმე ხისტიც კია პოლ კრუგმანის პოზიცია პუბლიკაციაში „ტრამპი და პუტინი ამერიკის წინააღმდეგ“.<sup>9</sup> ქლამნისტი საკმაოდ ემოციურად იკვლევს რუსეთის ფედერაციის ჩართულობას ამერიკის ბოლო საპრეზიდენტო არჩევნებში და იმოწმებს CIA-ისა და FBI-ის ახალ მტკიცებულებებს. „რუსეთის ფედერაციას ჰქონდა თავისი მიზეზები (მოტივაცია) თამაშიდან გაეყვანა ანტიპუტინისტი ჰილარი კლინტონი“ – ასეთია კრუგმანის შეფასება. ტრამპის პოზიცია კი, რომელიც, ავტორის თვალთახედვით, ჭლილურად შეაფასებს „რუსეთის უპრეცედენტო კიბერშეტევას ზესახელმწიფოს დემოკრატიულ პროცესზე, აშშ-ის ფასეულობებზე“, კრუგმანს მიუღებლად მიაჩნია.

მსუბუქად, ყოფითი სიტუაციის წინ წამოწევით, ერთგვარ ფონად გამოყენებით მიყვავართ პოლ კრუგმანს რთული ეკონომიკური პრობლემის გააზრებამდე საავტორო სვეტში „ჩემი კრიპტოსკეპტიციზმის მიზეზები“<sup>10</sup>: „ჯერ კიდევ შევბუღლებაში ვარ: მოგზაურობა, ველოსიპედით სეირნობა ევროპის სხვადასხვა კუთხეში. თუმცა, ასე თუ ისე, თვალს ვადევნებ სიახლეებსაც, ოღონდ, ძალზე იშვიათად და სრულიად დაუგეგმავად მიჩნდება დრო და საშუალება, რამე დავწერო და გამოვაქვეყნო“. აქ, ლიდში ავტორის ავტობორტრეტის უმნიშვნელოვანესი შტრიხიც იკვეთება – სადაც უნდა იყოს და რა სიტუაციაშიც, პროფესიონალი ქლამნისტი მუდმივად სიახლეებზე ორიენტირებული და შემოქმედებითად მომართულია. ეს საშვებუ-

ლებო სიმსუბუქე კი როულ სათქმელთან ბუნებრივად, იოლი გზით მისასვლელად, აზროვნების ლაბირინთებში მკითხველის გასაყოფიებლად დასჭირდა: „ახლა სწორედ ერთი ასეთი მომენტია და, ვიფიქრე, შემძლია გამოვთქვა ზოგიერთი მოსაზრება იმ საგანზე, რითაც დაბრუნების-თანავე დავკავდები. ორიოდ კვირაში ვაპირებ ვითამაშო ემანუილ გოლდსტეინის როლი – ბლოკჰეინის კონფერენციაზე აღიარებული მტრისა...“ აქვე კიდევ ერთი „ლირიკული გადახვევა“ და მორიგი შტრიხი პოლ კრუგმანის ჩახლართული ავტოპორტრეტისა: „ჰეი, თუ თქვენ მხოლოდ მეგობრულად განწყობილი აუდიტორიის წინაშე გამოდისხართ, ჩანს, ძალიან იმარტივებთ ცხოვრებას. ამიტომ, ვიფიქრე, ღირს განვმარტო, რატომ ვარ სკეპტიკური კრიპტოვალუტის<sup>11</sup> მიმართ“. ქალამნისტი ნამდვილად არ „იიოლებს“ ცხოვრებას და, ურთულეს პოლიტიკურ თუ ეკონომიკურ პრობლემებს შეჭიდებული, ხშირად დინების საწინააღმდეგოდ მიდის: „ბიტკოინის გაშვებიდან რვა წლის შემდეგ, კრიპტოვალუტა სუსტად ინერგება რეალურ ვაჭრობაში. ზოგიერთი ფირმა კი იყენებს მას გადახდის საშუალებად, მაგრამ მიმაჩნია, რომ ეს უფრო იმის მცდელობაა, დაგვანახონ: „შემომხედეთ, რა სუპერთანამედროვე ვარ“, ვიდრე არჩევანი შედეგის ეფექტურობის სასარგებლოდ. კრიპტოვალუტას მაღალი საბაზრო შეფასება აქვს, მაგრამ იგი, უმეტეს შემთხვევაში, ავანტიურულ გასართობად ითვლება და არა – გადახდის მოსახერხებელ საშუალებად“. ავტორი აქ ირონიულ ქვეტექსტსაც იყენებს კრიპტოვალუტის სახელწოდების – „Tether“ ტერმინთან – tethering<sup>12</sup> მსგავსების გახაზვით. მისი თვალთახედვით: „ყოველივეს განაპირობებს ორი რამ: ტრანზაქციული დანაზოგები და მიბმულობის არარსებობა“.

ნობელიანტი-ქალამნისტი ურთულეს ფინანსურ საკითხს გამოწველილვით განმარტავს, აანალიზებს და წო-

ნადი არგუმენტების მოშველიებით ავითარებს საკუთარ პოზიციას, ოღონდ, ჯერ მისთვის დამახასიათებელი სკეპტიციზმით სვამს რიტორიკულ კითხვას: „ნიშნავს თუ არა ყოველივე ეს, რომ კრიპტოვალუტა საპნის ბუშტია, რომელიც, ბოლოს, უბრალოდ, გასკდება?!“ ამ ვარაუდის გამართლებას, ღრმად, ანალიტურად მოაზროვნე მეცნიერი-ქალამნისტი სპეციფიური ფინანსური ოპერაციების, დეტალების ახსნით ცდილობს პოპულარული ენით, „ნიუ-იორკ ტაიმის“ რიგითი მკითხველის – არაეკონომისტისთვისაც გასაგებად და მისაწვდომად. დასკვნას კი ეფექტური ანალიტიკის გამოყენებით – ნაცნობი მოვლენის საშუალებით უცნობის, რთულის, ახლის ნათელყოფისთვის გვთავაზობს; კერძოდ, ოქროს, როგორც უძველესი ვალუტის, შედარებით თანამედროვე კრიპტოვალუტასთან: „გარკვეული აზრით, ოქრო იმავე სიტუაციაშია. ოქროს მარაგი, უბრალოდ, სადღაც ინახება და თავის ღირებულებას მხოლოდ იმიტომ ინარჩუნებს, რომ ადამიანები მას ძვირფასად მიიჩნევენ. თუმცა, ოქროს მართლაც აქვს პრაქტიკული გამოყენება, მაგალითად, საიუველირო ნივთების დასამზადებლად ან – კბილების დასაბჟენად, რაც უზრუნველყოფს მის სუსტ, მაგრამ მაინც ბმას (tethering) ეკონომიკასთან.

კრიპტოვალუტას კი, პირიქით, არ გააჩნია რაიმე საფუძველი, რაიმე კავშირი (tethering) რეალობასთან. მისი ფასი მთლიანად თვითრეალიზებად მოლოდინთანაა დაკავშირებული, რაც ჩავარდნის საფასებით რეალურ შესაძლებლობას ნიშნავს. თუ ყველა საქმოსანი ერთბაშად დაექვდება და უეცრად დაფრთხება ბიტკოინის გაუფასურების შიშით, იგი მართლაც დაკარგავს ღირებულებას“. პოლ კრუგმანს ეს საფასებით მოსალოდნელი ჰგონია, ამიტომაც დაასკვნის: „აი, რატომ ვარ კრიპტოსკეპტიკოსი. შესაძლოა, ცვდები? რა თქმა უნდა! მაგრამ, ვიდრე შემედავებით, ჯერ ერთ კითხვაზე მიპასუხეთ: რა პრობლემას

ავგარებს კრიპტოვალუტა? და ნუ შეეცდებით სკეპტიკოსთა ხმის, უბრალოდ, ჩახშობას ტექნიკური და ლიბერტარიანიული ნაბოღვარის ნარევით“. ასეთი მკაცრი და კატეგორიულია ქალამნისტის დასკვნა.

2018 წლის ივლისში პოლ კრუგმანი კვლავ უბრუნდება ბრექსიტის თემას, რომელიც, როგორც ჩანს, მისთვის ძალზე მტკივნეულია. ამჯერად ეკონომიკის ჭრილში განიხილავს მოვლენას და სათაურშივე ე.წ. „საფუძველისიტუაციით“ გამოკვეთს საკუთარ პოზიციას: „ბრექსითი გრავიტაციის პირისპირ“, <sup>13</sup> რაც, მედიათეორიაში კარგად ცნობილი „ფელეტონური სვლით“ ტექსტშია განვრცობილი და დაწვრილებით გაანალიზებული. აქ მთავარი „ინტრიგა“, როგორც მედიათეორეტიკოსები უწოდებენ, „საფუძველი-სიტუაცია“, <sup>14</sup> არსებითად, ტერმინში „გრავიტაცია“ მოიაზრება: იგი თავისი ჩვეულებრივი (დექსიკური) მნიშვნელობით ვერაფრით თავსდება ამ კონტექსტში, მაგრამ სწორედ თავისი „ალოგიკურობის“ მეშვეობით შემოაქვს ინტრიგა, აღვივებს ინტერესს.

ერთი შეხედვით, მაინც რა კავშირი უნდა ჰქონდეს გრავიტაციას, რომელიც, რიგითი მკითხველის (არაეკონომისტის, დ.ტ.) აზროვნებაში მსოფლიო მიზიდულობას ნიშნავს? სად მსოფლიო მიზიდულობა თუ ნიუტონის კანონები და სად – ბრექსითი? ლიდშიც გვერდს უვლის ამ დეტალს ავტორი და შემოვლითი გზით მიყვავართ უმთავრეს სათქმელამდე: „ბოლო დროს ძალიან ბევრს ვწერ სავაჭრო პოლიტიკაზე. ვიცი, ბევრად უფრო მნიშვნელოვანი თემებიც არსებობს... მაგრამ შემოსავლებისა და გასავლის საკითხები მუდამ აქტუალურია. თუ ბოლომდე გულახდილი ვიქნები, ვაჭრობის თემა ჩემთვის ერთგვარი თერაპიის ან – ესკაპიზმის <sup>15</sup> ფორმაა, რომელიც საშუალებას მაძლევს, მრუმე პოლიტიკურ სიახლეთა შორის ინტერვალებში, ჩემთვის მახლობელ და კარგად ნაცნობ საგნებზე მოვახდინო კონცენტრირება“. ამის შემდგომ,

როგორც სჩვევია, კრუგმანი წინმსწრებად გვთავაზობს ზოგიერთ საკუთარ მოსაზრებას განსახილველ საკითხზე: „ნებისმიერ შემთხვევაში, ბრექსიტის კრიზისზე ფიქრისას, თავად ბრიტანეთმა რომ გამოიწვია (და რასაც, სხვათა შორის, ჩანს, პუტინმაც ხელი წააშველა), ვფიქრობ, გონივრული იქნება, შევეცადოთ ზოგიერთი თანამდევი ეკონომიკური პრობლემის ახსნა, რაც თვალსაჩინო უნდა იყოს და, უთუოდ, აშკარაცაა არაერთი ბრიტანელი ეკონომისტისთვის, მაგრამ, როგორც ჩანს, გამოცანაა ბრექსიტის მომხრეთა და ფართო პუბლიკისათვის“.

ვიდრე უშუალოდ ამ ეკონომიკური პრობლემების ანალიზს შემოგვთავაზებდეს, ნობელიანტი-ეკონომისტი კვლავ ეფექტურ ჟურნალისტურ ფანდს მიმართავს და ჯერ თანამდევ პოლიტიკურ ასპექტებს განიხილავს პრობლემის ჭრილში: „ეს ასპექტები ნათელყოფენ, თუ რატომ ცდილობს ტერეზა მეი განახორციელოს „რბილი“ ბრექსითი, როგორც ზოგიერთები უწოდებენ – BINO-ბრექსითი, მხოლოდ სიტყვიერად და რატომ ვერ მოხერხდება რეალურ ცხოვრებაში ბრექსიტის მომხრეთა მიერ მხარდაჭერილი სავაჭრო შეთანხმების რეალიზება ამერიკის შეერთებულ შტატებთან“. ქალამნისტი არ ჩქარობს. მეცნიერული კეთილსინდისიერებით (რაც ჰქონდა თავისი არსებობის საუკეთესო პერიოდებში „სიტყვით დარწმუნების ხელოვნებად“ სახელდებულ ჟურნალისტურ პრაქტიკას და, რაც, თითქმის დაკარგა თანამედროვე მედიამ, დ.ტ.) წარმოაჩენს ორივე მხარის – ბრექსიტის მოწინააღმდეგეთა და მომხრეთა არგუმენტებს ისე, რომ არ გახაზავს არც ერთის უპირატესობას, თავს იკავებს პოზიციის გამჟღავნებისგან და მხოლოდ მოგვიანებით სვამს დამინტრიგებელ კითხვას: „რადაც ისე ვერ არის მთელ ამ ზღაპარში, მაგრამ რა?“ ეს ანაზღად „შემოგდებელი“ სიტყვა – ზღაპარი, უკვე მიანიშნებს ავტორის პოზიციას, შეამზადებს ნიადაგს მისი გამოკვეთისათვის.

შემდეგ მოდის რთული ეკონომიკური ასპექტების შესაძლო პოპულარული ენით ახსნა-განმარტება ფართო მკითხველისათვის და ბოლოს, უმთავრესი, „კვანძის გახსნა“ – თურმე, ნუ იტყვიტ და: „ქვეყნებს შორის ეკონომიკური ურთიერთობის ერთი, ყველაზე ეფექტური სისტემა ორ ქვეყანას შორის ვაჭრობის ე.წ. გრავიტაციული განტოლებაა, რომელიც გულისხმობს, რომ ვაჭრობაზე პოზიტიურ გავლენას ახდენს ორი ქვეყნის ეკონომიკის მასშტაბები, მისი მოცულობა, ხოლო ნეგატიურს – მანძილი ამ ქვეყნებს შორის. ამ კანონზომიერებას თვალსაჩინოდ დაინახავთ ბრიტანული ექსპორტის მიხედვით. გრაფიკზე გამოსახულია: Y ღერძზე – ბრიტანული ექსპორტის პროცენტული მონაცემები სხვადასხვა ქვეყანაში იმპორტიორი ქვეყნების ეკონომიკის მოცულობის მიხედვით, X ღერძზე კი – მანძილი შესაბამის ქვეყნამდე“. ვიდრე საფინანსო რიტორიკულ კითხვას დასვამს, პოლ კრუგმანი კიდევ უფრო აკონკრეტებს და ნათელყოფს პრობლემის არსს: „თუმცა ამერიკა სთავაზობს ბრიტანეთს ევროკავშირის თანაზომიერ ბაზარს, იგი ბევრად შორსაა ტერიტორიულად და ბრიტანეთმა რომც დადოს ეს შეუძლებელი გარიგება, ნაკლებსავარაუდოა, ამას იგივე ფასი ჰქონდეს, რაც მის ახლანდელ საბაჟო კავშირს“. ავტორი კიდევ ერთხელ გახაზავს, რომ: „ეს ყველაფერი ნათელყოფს, თუ რატომ ცდილობს ტერეზა მეი ისეთი გარიგების მიღწევას, რაც საბაჟო კავშირს უცვლელს დატოვებდა. თუმცა ეს უკვე გამოსავალი აღარაა: ევროკავშირი ძველებურად განუსაზღვრავს საბაჟო პოლიტიკას დიდ ბრიტანეთს, იმ სიახლით, რომ ბრიტანეთი ხმის უფლებას დაკარგავს. მაშ, რა აზრი აქვს ბრექსიტს? კარგი შეკითხვაა. სამწუხაროა, რომ რეფერენდუმამდე ბევრმა არ დასვა ეს კითხვა“. ეს „ღია დაბოლოება“<sup>16</sup> სათქმელს განსაკუთრებულ მნიშვნელობას ანიჭებს და ფიქრის, განსჯის სურვილს

ამდაფრებს, რაც, ვფიქრობ, უმთავრესია მედიაშემოქმედებაში.

საყოველთაოდ ცნობილი და დედამიწის მოსახლეობის დიდი უმრავლესობის მიერ მხოლოდ დადებით კონტექსტში მოაზრებული მოვლენის – ბერლინის კედლის დაცემის ძალზე არაორდინალური შეფასებით იწყებს პოლ კრუგმანი თავის მორიგ პუბლიკაციას – „ეს აქ რატომ უნდა მოხდეს“: „ბერლინის კედლის დაცემის შემდეგ, ძალიან მალე, ჩემმა მეგობარმა, ექსპერტმა საერთაშორისო ურთიერთობების დარგში, იხუმრა: „ახლა, როცა დასავლეთ ევროპა განთავისუფლდა მისთვის უცხო და მიუღებელი კომუნისტური იდეოლოგიისგან, მას შეუძლია მიუბრუნდეს თავის ჭეშმარიტ ისტორიულ გზას – ფაშიზმს“. იმ პერიოდშიც კი, მისი ეს გესლი საკმაოდ გაბედული ჩანდა. 2018 წელს ეს უკვე აღარც ჰგავს ხუმრობას“,<sup>17</sup> შენიშნავს ავტორი. აქ, როგორც რიგითი მკითხველი, უთუოდ დაიბნევი: ჯერ ერთი და, გერმანიის „ჭეშმარიტი ისტორიული გზა“ ფაშიზმი ნამდვილად არ მგონია. იგი, ჩემთვის (და – არა მხოლოდ), პირველყოვლისა, გოეთეს, ჰაინეს, ბახის, ბეთჰოვენის, ბრამსის, გუტენბერგის... სამშობლოა. თუმცა, ემოციებს ვერ ავეყვები, ვინაიდან, კვლევაზე მაქვს პრეტენზია და თავს მოვალედ ვთვლი, ქლამნისტის ამგვარი მსჯელობის ქვეტექსტებს ჩავწვდე, რისთვისაც პარალელს გამოვიყენებ: დაუუკვირდეთ, როგორ იკვლევდა გერმანული ფაშიზმის წარმომავლობას დიდი ქართველი ჰუმანისტი, მოაზროვნე და პუბლიცისტი გერონტი ქიქოძე: „როგორ მოხდა, რომ ფილოსოფოსების, ჰუმანისტებისა და მგოსნების ერი სალდათების ერთად იქცა?“ ამ რიტორიკულ კითხვას ჩვენი დიდებული მწერალი ფიქრის სულ სხვა მიმართულებით წარმართვისათვის სვამს: „ოდესღაც ცისფერი ყვავილი უყვარდა გერმანიას. ეს უმანკოების სიმბოლოა. დღეს მის ეროვნულ ბაირაღებს შურისძიებისა და სიკვდილის ფერი აღეგს“.<sup>18</sup> პუბ-

ლიცისტი ამ გლობალური მოვლენისადმი, რასაც ფაშიზ-  
მი ქვია, თავის დამოკიდებულებას, იდეურ მრწამსს, შე-  
მოვლითი გზით – ისტორიული ანალოგიებისა და ასოცი-  
აციური აზროვნების მოშველიებით ცდილობს: „გერმანე-  
ლების მოწინააღმდეგენი ამტკიცებენ, ამ ხალხში ყოველ-  
თვის სისხლისმსმელი მხეცი ცხოვრობდაო. შემდეგ მხე-  
ცებმა მიიძინეს დროებით, დღეს ხელახლა გამოძვრნენ  
ბუნაგებიდან, რადგან თოფის წამლის სუნი ეცათო“. გე-  
რონტი ქიქოძე, ჩანს, არ იზიარებს ამ მოსაზრებას, ვინაი-  
დან დასძენს: „არ არსებობს სხვადასხვა ერის მეტ-ნაკლე-  
ბი სისასტიკე ან ღმობიერება... ყოველ ადამიანში ერთნა-  
ირად სთვლემს ეშმაკიცა და ღვთაებაც“.<sup>19</sup> ამ დებულების  
არგუმენტად გერონტი ქიქოძე რომაელების ისტორიულ  
მაგალითსა და საქართველოს ისტორიის ფაქტებს იშვე-  
ლიებს. როგორც ვხედავთ, ამ ორი მოაზროვნის – გერონ-  
ტი ქიქოძისა და პოლ კრუგმანის მიერ ერთი და იმავე  
ფენომენის შეფასებები დიამეტრალურად განსხვავებუ-  
ლია. მკითხველს ვუტოვებთ არჩევანის ფუფუნებას – რო-  
მელს მიიღებს ამ ორგვარი თვალსაზრისიდან, რას გაი-  
თავისუფლებს? ჭეშმარიტი თავისუფლება ხომ, როგორც არის-  
ტოტელე ბრძანებს, არის „არჩევანისა და გადაწყვეტილე-  
ბის მიღების თავისუფლება“. აქ ზიგმუნდ ფროიდის საინ-  
ტერესო გამოკვლევაც შეგვახსენებს თავს: „ენამახვილობა  
და მისი ქვეცნობიერთან მიმართება“;<sup>20</sup> სადაც უმთავრესი  
დანასკვი ასეთია: „სუბიექტური პირობები ჩვენს სულში...  
განსაზღვრავენ ჩვენს მოდალობას; გონებამახვილურ შე-  
ნიშვნას ძალუძს ზედაპირზე ამოატივტივოს ქვეცნობიერ-  
ში დაღეჭილ-მიჩქმალული ჩვენი განცდები... სულიერი  
კონფლიქტის სარკასტული გამონათქვამით გამოხატვა  
ხელს უწყობს ფსიქიკური ენერჯის გამოთავისუფლებას,  
რაც სიამოვნებას გვანიჭებს“. შესაბამის ნიმუშად ფროი-  
დი გვთავაზობს ჰაინეს გონებამახვილურ გამონათქვამებს,  
რომელთა საფუძველსაც პოეტის ადრეული ახალგაზ-

რდობის წლებში მისი მდიდარი ნათესავების მხრივ გენი-  
ალური პოეტის მიმართ გამოჩენილ უსულგულობასა და  
მისი იგნორირების, მის მიმართ გამოჩენილი ქედმაღლო-  
ბის პასუხად ქვეცნობიერში დაღეჟილ პროტესტსა და  
ტკივილში ვარაუდობს. ანალოგიურად, ბრესტ-ლიტოვსკუ-  
რი წარმომავლობის ნიუ-იორკელი ებრაელის ქვეცნობი-  
ერში მისი ერის მიმართ გამოვლენილი ფაშისტური სი-  
სასტიკის გამო დაღეჟილი ბუნებრივი ბოღმა და ტკივი-  
ლი, იქნებ, სწორედ ის იმპულსია, რაც გერმანელი ერის  
ისტორიის ამ საჩოთირო პერიოდს უკავშირდება პოლ-  
კრუგმანის ქვეცნობიერში და ამიტომაც გაითავისებს იგი  
ექსპერტი მეგობრის გესლიან ენამახვილობას, ქართველი  
მკვლევრისგან განსხვავებით, რომელსაც ფაშიზმის სი-  
სასტიკის პარადელურად, არ ეთმობა „ფილოსოფოსების,  
ჰუმანისტებისა და მგოსნების ერი“ მხოლოდ ფაშისტური  
პერიოდისათვის შესატოვებლად. ეს მხოლოდ ჩემი ვარაუ-  
დია, რაზეც, უთუოდ, ღირს დაფიქრება...

მაინც რისთვის დასჭირდა კრუგმანს მეგობრის ამ  
სარკასტული შენიშვნის გახაზვა, წინა პლანზე წამოწევა?  
როგორც თავად წერს: „დასავლეთ ევროპაში ვითარდება  
ის მოვლენა, რასაც Freedom House-ი ანტილიბერალიზმს  
უწოდებს. ეს შეეხებათ ევროკავშირის წევრ ქვეყნებს –  
პოლონეთსა და უნგრეთს, რომლებშიც დემოკრატია, ჩვე-  
ულებრივი გაგებით, უკვე მკვდარია“. ამ მკვეთრი (მეტი  
რომ არ ვთქვა) შეფასების დასაბუთებას ქალამნისტი შემ-  
დეგი მსჯელობით ცდილობს: „ორივე ქვეყანაში მმარ-  
თველმა პარტიებმა – „სამართალი და სამართლიანობა“  
პოლონეთში, ხოლო „ფიდესი“ უნგრეთში, დაამყარეს რე-  
ჟიმი, რომელიც ფორმალურად სახალხო არჩევნებს ინარ-  
ჩუნებს, მაგრამ, ამავდროულად, დაანგრის სასამართლო  
ხელისუფლების დამოუკიდებლობა, თრგუნავენ პრესის  
თავისუფლებას, დააკანონეს ფართომასშტაბიანი კორუფ-  
ცია და ეფექტურად მოახდინეს განსხვავებული აზრის

დელეგატიმაცია. ყოველივე ამის შედეგი, სავარაუდოდ, იქნება სახელმწიფოს ერთპარტიული მმართველობა“. ამ ორი ქვეყნის მაგალითზე ქალამნიტს თავისი უმთავრესი სათქმელისაკენ მიყვავართ და ამგვარი ანალოგიებით ცდილობს დამაჯერებლობის მიღწევას: „იგივე მარტივად შეიძლება მოხდეს ამერიკაშიც...“ ამ მოსალოდნელი საფრთხის მიზეზს კრუგმანი რესპუბლიკური პარტიის ქმედებებში ხედავს. მისი აზრით, რესპუბლიკური პარტია მზადაა და სურს კიდევ, გახდეს პოლონური „სამართალი და სამართლიანობის“ ან – უნგრული „ფიდესის“ პარტიის ამერიკული ვერსია“, რათა გამოიყენოს ახლანდელი პოლიტიკური ძალაუფლება და გაინადლოს მუდმივი მმართველობა. პოლ კრუგმანი ამ ყველაფერში ხედავს ტირანიის საშიშროებასა და უფრო მეტსაც – იგი საუბრობს ე.წ. „თეთრ ნაციონალიზმზე“, რომელმაც, პოლ კრუგმანის აზრით: „უკვე გაანადგურა დემოკრატია დასავლეთის ზოგიერთ ქვეყანაში. ჩვენ წარმოუდგენლად ახლოს ვართ მსგავს ვითარებასთან“.

მომდევნო პუბლიკაციის სათაურშივე კრუგმანი საჭირობოროტო კითხვას სვამს: „ვისთვის იზრდება ეკონომიკა?“<sup>21</sup> აქ სემანტიკური ბირთვი, რომლის ირგვლივაც ტრიანალებს მთელი მსჯელობა, ისაა, რომ: „ერთ დროს, კითხვის დასმა, თუ ვინ მოიგებს ეკონომიკური ზრდის შედეგად, საჭიროც არ იყო იმ მარტივი მიზეზით, რომ შემოსავლები მუდმივად იზრდებოდა, პრაქტიკულად, ყველასთვის; მაგრამ 1970-იანი წლებიდან მოყოლებული, კავშირი ზოგადად ეკონომიკის ზრდასა და ინდივიდუალურ შემოსავლებს შორის გაწყდა ბევრი ამერიკელისთვის. ერთის მხრივ, უმრავლესობისთვის შრომითი ანაზღაურება გაიყინა: ინფლაციის გათვალისწინებით, საშუალო სტატისტიკური მამაკაცი დღეს ნაკლებს გამოიმუშავებს, ვიდრე 1979 წელს. მეორეს მხრივ, ზოგიერთი კერძო პირის შემოსავალი ბევრად უფრო სწრაფად იზრდება, ვიდრე მთლიან

ნად ეროვნული შემოსავალი. ამრიგად, მსხვილი კომპანიის გენერალური დირექტორი 270-ჯერ მეტს გამოიმუშავებს, ვიდრე საშუალო სტატისტიკური თანამშრომელი, თანაც, 27-ჯერ მეტს, ვიდრე 1980 წელს“. ქალამნისტი იკვლევს ამ დილემის მიზეზებს, აანალიზებს როგორც ეკონომიკური, ასევე პოლიტიკური კუთხით და გვთავაზობს საგულისხმო დასკვნებსა და რეკომენდაციებს დარღვეული წონასწორობის აღსადგენად.

დასასრულს, უნდა ითქვას, რომ არაორდინალური ეკონომისტი და, უთუოდ, ორიგინალურად მოაზროვნე ანალიტიკოსი-პუბლიცისტი, ნობელიანტი საერთაშორისო ეკონომიკის დარგში პოლ რობინ კრუგმანი არა მხოლოდ „ნიუ-იორკ ტაიმის“ წამყვანი ქალამნისტია, არამედ, ერთი გამორჩეულ სახეთაგანი თანამედროვე ამერიკულ მედიაში. მის ეკონომიკური თუ პოლიტიკური შინაარსის ტექსტებს ახასიათებს პრობლემათა სკრუპულოზური, მეცნიერული დამუშავება, ანალიზის სიღრმე და, ამავდროულად, სიტყვის, ფრაზის ფლობის ოსტატობა. ტენდენცია ხშირ შემთხვევაში სათაურშივეა გაცხადებული და აქტიური დასაწყისით – ლიდით გამყარებული. ქალამნისტს გონებამახვილობასთან ერთად ახასიათებს ენამახვილობაც, რისი შედეგიცაა ეფექტური, ექსპრესიული შინაარსი, ხშირად სუბიექტური და, შესაბამისად, სადავოც, მაგრამ პრინციპულად, გულწრფელად გამოხატული ავტორისეული პოზიცია, ტენდენცია თუ კონცეფცია, რომელსაც შესაძლოა დაეთანხმონ, ან არ გაიზიარო ბოლომდე, მაგრამ გულგრილი არასოდეს რჩები, ვინაიდან გადამდებია მისი ემოციურად მუდერი, გულშემატკივრული დამოკიდებულება პრობლემებისადმი და მათი გადაჭრის გზათა აზარტული, ამავდროულად, პროფესიონალური ძიება.

ვერ ვიტყვი, რომ „მშურს“ ამერიკული ქალამნისტიკის ასეთი სიმაღლისა (შური ყველა შემთხვევაში ბნელი

და ჩემთვის სრულიად მიუღებელი ემოციია), მაგრამ უფლებას ვიტოვებ, როგორც ილია მართალი გვმოძღვრავს,<sup>22</sup> შევნატროდე ამერიკული მედიის პროფესიულ ღონეს იმდენად, რომ ახლახან გაზეთების „ვაშინგტონ პოსტისა“ და „ნიუ-იორკ ტაიმსისათვის“ მინიჭებული პულიტსერის პრემია „მეცოტავება“.

## ლიტერატურა ■ References

1. ჯონ მქონარდ კქონსი – ინგლისელი ეკონომისტი, კენსიანიზმის დამფუძნებელი ეკონომიკის თეორიაში. ითვლება მაკროეკონომიკის, როგორც დამოუკიდებელი მეცნიერების, ერთ-ერთ მამამთავრად.
2. პოლ კრუგმანი, „კრიზისიდან გამოსავალი არსებობს“: ვინ არის დამნაშავე ამერიკულ და მსოფლიო ეკონომიკურ კრიზისში? რა გამოსავალი არსებობს და რა უნდა მოიმოქმედონ ბიზნესმენებმა და პოლიტიკოსებმა მის დასაძლევად? როდის დასრულდება რეცესია და როგორ ავიცილოთ მისი განმეორება? (წიგნი არაერთ საჭირობოროტო კითხვას პასუხობს).
3. Krugman, Paul (2018, April 23). We Don't Need No Education. *The New York Times*, <<https://www.nytimes.com>>
4. Nadare, Maia (2002). *Alpha & Omega of Publicistic Writing: From Lead to Ending*. Tbilisi: Tbilisi University Press (In Georgian).
5. Standing, Suzette Martinez (2008). *The Art Column Writing*. Oark Masion Street Press.
6. ტყეზუჩავა დიანა (2011). ჟურნალისტიკამცოდნეობა მომიჯნავე დისციპლინათა ჭრილში, თბილისი: „უნივერსალი“.
7. კრუგმანი პოლ (30 ივნისი, 2016). მთელი ევროპული პროექტი დიდი დარტყმის საფრთხის წინაშე, გაზ. „ნიუ-იორკ ტაიმსი“.
8. Krugman, Paul (2018, June 1). Oh, What a Stupid Trade War (Very Slightly Wonkish). *The New York Times*, <<https://www.nytimes.com>>
9. კრუგმანი პოლ (20 თებერვალი, 2018). ტრამპი და პუტინი ამერიკის წინააღმდეგ, გაზ. „ნიუ-იორკ ტაიმსი“.
10. Krugman, Paul (2018, July 31). Transaction Costs and Tethers: Why I'm a Crypto Skeptic. *The New York Times*, <<https://www.nytimes.com>>

11. კრიპტოვალუტა – ელექტრონული ფული, რომელიც მომხმარებელს საშუალებას აძლევს თანხა გაგზავნოს ინტერნეტით მსოფლიოს გარშემო უმოკლეს დროში, უშუაშაველოდ, ანონიმურად, იდენტიფიცირების გარეშე.
12. TETHER – კრიპტოვალუტის სახელწოდება; tethering – მიბმულობა, დაბმა, შეზღუდვა.
13. Krugman, Paul (2018, July 11). Brexit Meets Gravity. *The New York Times*, <<https://www.nytimes.com>>
14. ტყეუზავა დიანა (2020). მედიატექსტის ბუნება: ფუნქციურ-ტიპოლოგიური ანალიზი. თბილისი: „უნივერსალი“.
15. მსკაპიზმი – კრიზისისა და გაჭირვების უამს ინდივიდის მიერ რეალური სამყაროდან ილუზორულ ხილვებში გაქცევის მცდელობა (იხ. აგრეთვე, ესკიპიზმი) [იხ.: ელერდაშვილი ალექსანდრე (შემდგ.) (2006). უნივერსალური ენციკლოპედიური ლექსიკონი სამ ტომად. პირველი გამოცემა, თბილისი: „ფანტაზია“.
16. *Alpha & Omega of Publicistic Writing* (Nadare, 2002).
17. Krugman, Paul (2018, August 18). Why It Can Happen Here. *The New York Times*, <<https://www.nytimes.com>>
18. ჭიკოძე გერონტი, ცეცხლის სარბიელი // იხ.: ტყეუზავა დიანა (1997). პუბლიცისტური ტექსტის შინაარსობრივი ელემენტები. თბილისი: თბილისის უნივერსიტეტის გამომცემლობა, გვ. 47.
19. იქვე.
20. Фрейд, Зигмунд (1997). *Остроумие и его отношение к бессознательному*. Санкт-Петербург–Москва: Университетская книга, стр. 17-141.
21. Krugman, Paul (2018, August 30). For Whom the Economy Grows. *The New York Times*, <<https://www.nytimes.com>>
22. ჭავჭავაძე ილია: „...შური ვერ იტანს სხვისა ღირსებას, ნატვრა კი შეჰხარის, შური ებრძვის ღირსებას, ნატვრა კი ეტრფის“ [იხ.: ჭავჭავაძე ილია (1987). რჩეული ნაწერები ხუთ ტომად. ტომი 5, თბილისი).